



Broj: 04-47-5-233/19VT
Banja Luka, 14.03.2019. godine

Institut za intelektualno vlasništvo Bosne i Hercegovine (u daljem tekstu: Institut), na osnovu člana 13. stav (1) Zakona o kolektivnom ostvarivanju autorskog i srodnih prava („Službeni glasnik BiH“, br. 63/10; u daljem tekstu: Zakon), a u vezi sa članom 12. Zakona, postupajući po službenoj dužnosti d o n o s i

RJEŠENJE o nalaganju mjera za otklanjanje nepravilnosti u radu

1. **NALAŽE SE** Asocijaciji kompozitora-muzičkih stvaralaca AMUS provođenje sljedećih mjera za otklanjanje nepravilnosti u radu, i to:

- sazivanje **redovne sjednice** Skupštine na kojoj je potrebno razmotriti i usvojiti dokumenta predviđena članom 20. Zakona o kolektivnom ostvarivanju autorskog i srodnih prava, za 2017. godinu;
- sazivanje **redovne sjednice** Skupštine na kojoj će se razmatrati i odlučivati o svim dokumentima koji su navedeni u pozivu članovima Skupštine AMUS-a na elektronsko izjašnjanje o dokumentima, koji je uputio predsjednik Upravnog odbora AMUS-a, dana 08.03.2019. godine;
- stavljanje van snage svih odluka koje su donesene na osnovu izjašnjanje na elektronskoj Skupštini AMUS-a (u periodu od 23.1. do 4.2.2019. godine) i to: Odluke o usvajanju Godišnjeg izvještaja i Izvještaja nezavisnog revizora za 2017. godinu; Odluke o usvajanju Godišnjeg plana i programa rada i finansijskog plana za 2019. godinu i Odluke o sredstvima za kulturne i socijalne namjene i njihovo razmatranje na redovnoj Skupštini;

3. Rok za otklanjanje navedenih nepravilnosti u poslovanju je 60 dana od dana prijema rješenja.

4. Ovo rješenje stupa na snagu danom donošenja.

O b r a z l o ž e n j e

Institut za intelektualno vlasništvo Bosne i Hercegovine zaprimio je dana 13.03.2019. godine, pod brojem 04-47-5-230/19, obavještenje od Asocijacije kompozitora – muzičkih stvaralaca da je predsjednik Upravnog odbora AMUS-a uputio poziv autorima, članovima Skupštine AMUS-a da se elektronskim putem ili putem pošte izjasne o sljedećim odlukama;

1. Odluka da se vrši isplata autorskih naknada na način da se izvrši isplata autorskih naknada iz obračuna u kojem nisu utvrđene nepravilnosti, a da se sredstva kod autora i emitera kod kojih su utvrđene nepravilnosti ne isplate do momenta okončanja potpune provjere dostavljenih podataka i poduzetih radnji, a sve uz obavezu da se sredstva koja su označena kao sporna deponuju na poseban račun za svakog autora, a sve u cilju zakonitog i transparentnog postupanja i obezbjeđenja ovih sredstava i ovih autora kao što je naprijed navedeno;
2. Odluka o usvajanju zapisnika:
 - sa Skupštine održane 20.12.2017. godine;
 - sa elektronske Skupštine održane 21.02.2018. godine;
 - sa Skupštine održane 09.05.2018. godine;
 - sa Skupštine održane 29.10.2018. godine;
 - sa elektronske Skupštine održane 06.02.2019. godine;
3. Odluka o usvajanju izmjena i dopuna Statuta AMUS-a;
4. Odluka o usvajanju izmjena i dopuna Poslovnika o radu Skupštine;

5. Odluka o usvajanju Pravilnika o poslovnoj tajni;
6. Odluka o usvajanju Pravilnika o raspodjeli ubranih naknada.

Takođe, Institut za intelektualno vlasništvo Bosne i Hercegovine zaprimio je dana 14.02.2019. godine, pod brojem 04-47-5-163/19, obavještenje od Asocijacije kompozitora – muzičkih stvaralaca da je Skupština AMUS-a, na osnovu glasanja elektronskim putem odnosno poštom usvojila sljedeće odluke: Odluku o usvajanju Godišnjeg izvještaja i Izvještaja nezavisnog revizora za 2017. godinu; Odluku o usvajanju Godišnjeg plana i programa rada i finansijskog plana za 2019. godinu i Odluku o sredstvima za kulturne i socijalne namjene.

Članom 20. Zakona o kolektivnom ostvarivanju autorskog i srodnih prava („Službeni glasnik BiH“ br. 63/10) propisano je da kolektivna organizacija za svaku poslovnu godinu, u roku od 6 mjeseci poslije njenog završetka, usvojiti, odnosno pribaviti sljedeću dokumentaciju: godišnji izvještaj organa upravljanja i nadzornih organa o iznosu naplaćenih naknada po vrsti djela i njihovoj raspodjeli, poslovanju kolektivne organizacije, izvještaj o izvršavanju kolektivnih ugovora i ugovora zaključenih sa stranim kolektivnim organizacijama; izvještaj revizorske kuće o izvršenoj kontroli finansijsko-računovodstvene dokumentacije, zajedno s nalazom ovlaštenog revizora o pravilnosti i usklađenosti poslovanja kolektivne organizacije s odredbama zakona, s aktima kolektivne organizacije i sa zaključenim ugovorima, mišljenje organa upravljanja i nadzornog organa o izvještaju i nalazu revizorske kuće, preduzete mjere, ako je ovlašteni revizor našao nepravilnosti u poslovanju kolektivne organizacije, prijedlog finansijskog plana kolektivne organizacije za narednu godinu, koji uključuje plan troškova njenog poslovanja.

Članom 24. Statuta AMUS-a predviđeno je da navedene akte usvaja Skupština AMUS-a.

Članom 21. Statuta AMUS-a propisano je da je Skupština udruženja najviši organ udruženja koju čine svi redovni članovi udruženja sa jednakim pravom glasa. **Skupština se sastaje najmanje jednom u toku kalendarske godine** ili po potrebi i ima za cilj kontrolu rada udruženja putem razmatranja izvještaja o radu udruženja. O sjednici Skupštine vodi se zapisnik u koji se unose svi podaci o radu Skupštine, a naročito tok diskusije, zaključci i podaci o glasanju.

Skupština AMUS-a nije, u skladu sa članom 20. Zakona o kolektivnom ostvarivanju autorskog i srodnih prava, usvojila godišnji Izvještaj o poslovanju za 2017. godinu i druga dokumenata predviđena ovim članom zakona. U 2018. godini, Skupština AMUS-a nije punovažno odlučivala i razmatrala navedene dokumente. Skupština je sazivana 4 puta, ali zbog problema sa utvrđivanjem kvoruma za punovažno odlučivanje, nije razmatrala i donosila odluke o usvajanju navedenih dokumenata. Predsjednik i podpredsjednik Skupštine su podnijeli neopozive ostavke na svoje funkcije.

Statutom AMUS-a nije predviđena mogućnost održavanja Skupštine **koja se svodi samo na elektronsko glasanje (za, protiv ili suzdržan), bez mogućnosti da se o svim tačkama dnevnog reda provede diskusija i rasprava**, pa da se nakon održane rasprave pristupi javnom glasanju. Ovo je posebno značajno zbog činjenice da je AMUS kolektivna organizacija koja ostvaruje prava autora muzičkih djela, na osnovu dozvole koju je dobila od Instituta, i da djeluje u svoje ime, a za račun autora koji su svoja isključiva autorsko-pravna ovlaštenja prenijeli na organizaciju. AMUS ostvaruje prihode isključivo od korištenja imovinskih prava svojih članova i tako upravlja tuđim novcem. Dakle, AMUS postoji zbog autora i zbog te bitne činjenice potrebno je osigurati transparentnost poslovanja AMUS-a i maksimalan stepen demokratičnosti, što je moguće postići samo ako se autorima (članovima Skupštine AMUS-a) omogući da na redovnoj sjednici Skupštine raspravljaju i odlučuju o svim bitnim pitanjima u kolektivnoj organizaciji, a posebno o **izmjenama i dopunama Statuta i pravilima o raspodjeli ubranih naknada**.

Osnovna obilježja sistema kolektivnog ostvarivanja autorskog i srodnih prava su demokratičnost upravljanja organizacijom i transparentnost njenog rada i zabrana diskriminatorne prakse organizacije prema pojedinim titularima prava. AMUS je uvođenjem prakse elektronskog izjašnjavanja autora, članova Skupštine, bez mogućnosti raspravljanja o predloženim dokumentima i predlaganja aneksa na iste, onemogućio demokratičnost i transparentnost upravljanja organizacijom, jer je Skupština organ

koji ima za cilj da se kroz njega realizuje demokratsko uređenje udruženja i princip upravljanja udruženjem od strane njenih članova.

Na osnovu naprijed iznesenog, u skladu sa članom 13. Zakona, odlučeno je kao u dispozitivu ovog rješenja.

Pouka o pravnom lijeku: Ovo rješenje je konačno u upravnom postupku. Protiv ovog rješenja može se pokrenuti upravni spor, podnošenjem tužbe Sudu Bosne i Hercegovine u roku od 60 dana prijema rješenja.

DOSTAVLJENO:
-AMUS, Trg solidarnosti 2a,
71 000 Sarajevo
-a/a



